

Slalom Ambri vom 08./09.10.2011

us Sicht vom Schriiberling Denise

A dem Wochenändi hed de ledschti nationali Slalom in Ambri schtattgfonde.

Da de Tom und ich vergässe hend, frei ii z'gä, simmer am Obe noch em Schaffe abgfahre.
Was för en Fähler! Mier sind sicher e Schtund oder länger vor em Gotthard gschtande wäg
dene blöde schtau-verursachende Ample!!!

Mann, hed das gnervt!!

Irgendwann simmer us em Gotthard-Tunnel (32 grad det inne, hed mi fascht
wägbräamed!!!) usecho, de hed's tatsächlich gschneit!!!!

Noch em Tunnel hend au scho de Remo und sin Kolleg gwartet, will ihres Auto so komischi
Grüsch gmacht hed... Min Husmech, de Tom, hed schnell usegfunde gha, a was es gläge hed.



Tja, mer sett halt eifach alig s'Rad richtig azieh!!

Wo mier äntlich in Ambri gsi sind, hemmer ned chönne is Fahrerlager ine, will grad de
Hockey-Match fertig gsi isch und die alli hei hend welle und uf dere Schtross ned zwei Autos
anenand verbii chömed... Also hemmer müesse nöime go warte... Di einte hend Kafi, mier
Grappa und anderi Bier debii gha und will mer all scho gfreore hend, hemmer d'Jagge vöregno
und sind dete chli blöd umegschtande und hend Kafi Schnapps und Bier trunke ;o). Sind denn
nacher di zwei Meter is Fahrerlager gfare und es isch sicher scho zähni, halbi elfi gsi, wo
mer äntlich hend chönne ablade und üs iirichte, puh...

Mier sind scho lang nümm sooooo vill lüt vom RCA gsi amene Renne, isch extrem gsi!



Ich be jo am Samschtig gfare und es isch arsch-chalt (das chasch ned anderscht säge) gsi
und hed grägnat. Das aber wenigstens de ganz Tag und es hed immer Pfütze uf de Pischte
gha, dass mängisch ächt Aqua-Planing gha hesch und mis Ärschli, also das vo mim Auto, mich
immer hed welle überhole.

Schlussäntlich han ich mini Sach ned schlächt gmacht, be zfride gsi mit minnere Ziit und denn
hend's sogar no d'Lotus us üsere kategorie usgno und id Roadster-Klass umteilt (das, wo
mier immer hend welle), juhui. Aber ei Lotus, wo vom L2 is L4 umteilt worde isch, die hend's
denn vergässe und drum hed die denn au gwunne...und ich be denn vierti vo sibe worde,
freu! (also eigentlich wär ich sogar dritti gsi, das isch cool, hihi...)



De Tom hed am Sunntig schtahlblaue Himmel und Sonne gha, deför hed's saumässig gwindet. Aber es isch eim doch es bitz wärmer inecho... Är isch super gfahre, hed sin intern Fight mit em Böhli gha, we immer und denn simmer vöre d'Ranglischte go aluege und denn schtod bim Tom zweimal "nicht gewertet". Hä? Tom zum Rennleiter und dä hed gmeint, er heig ide ledschte Schikane beidi mol es Tor uslo. Es isch tatsächlich so gsi und tued mier ächt leid, will er isch soooo super gfahre! S'geilschte isch aber sini Show im ledschte Rennlauf gsi: Er isch us dere besagte Schikane cho und im vollrdrift hed er welle is Ziil ine, denn hed's en treid und er isch drehend is Ziil ine gschlittered, hed hammer usgseh!!! Denn hed er en Donut gmacht und isch is parc fermé inegfahre, hihi... echt cool gsi.

Nocher simmer ned mol me ad Priisverteilig gange, sind bis uf Airolo uf de Näbeschtröss gfahre und denn uf d'Bahn und mier hend soooo Dusel gha! Noch eus hend's d'lifahrt gschperrt und drum hed Polizei d'Bahn gschperrt gha und mier hend alli dörfe inedrängle. Hätsch das huupkonzert selle ghöre, vo dene, wo dete scho ewig im Schtau gschtande sind (verschtändlich)... Fünf Auto bis zur Schperri sind Mirco und Nicole gschtande, wo einehalb Schtund vorhär scho abgfahre sind und leider in Ambri uf d'Bahn sind...übel... Mier sind denn super durecho und Luzern isch au eischpuurig befahrbar gsi. So simmer mega früe Deheime gsi!

Und de oberhammer isch gsi: am Samschtig bin ich mit em Velo go d'Schtrecki aluege am Mittag und d'Schtreckepöschte sind mit de Auto z'fahre cho zum go z'Mittag ässe und zwei sind renn-mässig dehär cho und denn hed's tätscht und klöpft und di zwei sind inenand inegfahre!!!! En Polo in e Porsche ine. Das sind scho Tube, so was han ich no nie erläbt!!!! Vo wäge Sicherheit und näb em Renne wird ned Renne gfahre und denn so was! Isch jo au gföhrlich, will d'Schtrecki offe gsi isch för d'Besichtigung. Ich hoffe, die hend no en Zämeschiss becho...unglaublich... und denn müend mier eus alig weder alose, dass mier undiszipliniert siged! ;o)

Sorry för de eisiitigi bricht...und das es eeeeeewig duured hed... ☺
D'Ranglischte chönd ier jo uf eusere Websiite aluege...

Denise